

四庫全書

集部

欽定四庫全書

集部

小亨集卷二

詳校官中書

臣徐志晉

侍讀

臣孫球覆勘

謄錄監生

臣馮克鞏

謄錄監生

臣王人作

欽定四庫全書

集部五

提要

小亨集六卷

別集類四元

臣等謹案小亨集六卷元楊宏道撰宏道字叔能淄川人生金之季其事蹟不見於史傳以集中詩文考之宣宗興定末始與元好問會於京師是時金已南遷至哀宗正大元年嘗監麟游酒稅後又仕宋以理宗端平元年

為襄陽府學教諭其授趙制置劄有歸朝未  
滿三載語則當以紹定末南歸者而集中又  
有贈仲經詩序稱端平二年清明後出襄陽  
攝唐州司戶十二月上旬北遷寓家濟源云  
云則在宋未久旋入於元考之宋史是歲七  
月元兵至唐州金子才棄師宵遁唐州遂為  
元所取宏道蓋因此北還耳其後遂鮮所表  
見當未經復仕惟集中門帖子有己酉再逢

鬢未皤之句計入元又十四五年而宏道年  
已六十矣綜其生平流離南北竊祿苟全其  
出處之際蓋無足道然其詩則在當日最為  
有名元好問序其集謂金南渡後學詩者惟  
辛敬之楊叔能以唐人為指歸又序楊飛卿  
陶然集謂貞祐後詩學為盛洛西辛敬之淄  
川楊叔能太原李長源龍坊雷伯威北平王  
子正皆號稱專門又有贈宏道詩云海內楊

司戶聲名三十年又云星斗龍門姓氏新豈  
知書劍老風塵其傾倒於宏道甚至劉祁歸  
潛志亦以宏道與好問及李汾杜仁傑並稱  
同時若趙秉文楊雲翼見其詩並稱嘆不已  
秉文至比之金膏水碧物外難得之寶今觀  
所作五言古詩得比興之體時時近漢魏遺  
音律詩風格高華亦頗有唐調雖不及好問  
之雄渾蒼堅然就一時詩家而論固不可謂

非北方之巨擘也焦竑經籍志載小亭集十五卷世久失傳今從永樂大典中搜輯編綴釐為詩五卷文一卷乾隆四十六年九月恭

校上

總纂官臣紀昀臣陸錫熊臣孫士毅

總校官臣陸費墀



小亨集原序

貞祐南渡後詩學大行初亦未知適從溪南辛敬之淄川楊叔能以唐人為指歸敬之舊有聲河南叔能則未有知之者興定末叔能與予會于京師遂見禮部閑閑公及楊吏部之美二公見其幽懷久不寫及甘羅廟詩嘖嘖稱嘆不已今世少見其比及將往關中張左相信甫李右司之純馮內翰子駿皆以長詩贈別閑閑作引謂其詩學退之此日足可惜頗能似之至比之金膏水

碧物外自然奇寶景星丹鳳承平不時見之嘉瑞叔能用是名重天下今三十年然其客于楚於漢沔於燕趙魏齊魯之間行天下四方多矣而其窮亦極矣叔能天資澹泊寡于言笑儉素自守詩文似其為人其窮雖極其以詩為業者不變也其以唐人為指歸者亦不變也今年其所著小亨集成其予復見予鎮州以集引為請予亦愛唐詩者惟愛之篤而求之深故似有所得嘗試妄論之詩與文特言語之別稱耳有所記述之謂文吟

咏情性之謂詩其為言語則一也唐詩所以絕出於三百篇之後者知本焉爾矣何謂本誠是也古聖賢道德言語布在方策者多矣且以弗慮胡獲弗為胡成無有作好無有作惡樸雖小天下莫敢臣較之與祈年孔夙方社不莫敬共明神宜無悔怒何異但篇題句讀不同而已故由心而誠由誠而言由言而詩也三者相為一情動於中而形于言言發乎邇而見乎遠同聲相應同氣相求雖小夫賤婦孤臣孽子之感諷皆可以厚人倫

美教化無他道也故曰不誠無物夫惟不誠故言無所  
主心口別為二物物我邈其千里漠然而往悠然而來  
人之聽之若春風之過焉耳其欲動天地感神鬼難矣  
其是之謂本唐人之詩其知本乎何溫柔敦厚藹然仁  
義之言之多也幽憂憔悴寒饑困憊一寓于詩而其阨  
窮而不憫遺佚而不怨者故在也至於傷讒疾惡不平  
之氣不能自掩責之愈深其旨愈婉怨之愈深其辭愈  
緩優柔饜飫使人涵泳於先王之澤情性之外不知有

文字幸矣學者之得唐人為指歸也初予學詩以十數  
條自警云無怨懟無詭浪無驚狠無崖異無狡訐無嬖  
阿無傳會無籠絡無街鬻無矯飾無為堅白辨無為賢  
聖癡無為妾婦妬無為仇敵謗傷無為聾俗閤傳無為  
瞽師皮相無為黥卒醉橫無為黥兒白捻無為田舍翁  
木強無為法家醜詆無為牙郎轉販無為市倡怨恩無  
為琵琶娘人魂韻詞無為邨夫子兔園策無為算沙僧  
困義學無為稠梗治禁詞無為天地一我今古一我無

為薄惡所移無為正人端士所不道信斯言也予詩其  
庶幾乎惟其守之不固竟為有志者之所先今日讀所  
謂小亨集者祇以增媿汗耳予既以如上語為集引又  
申之以種松之詩因為復言歸而語乃翁吾老矣自為  
瓠壺之日久矣非夫子亦何以發予之狂言己酉秋八  
月初吉河東元好問序

小亨集原序考證

第一頁前五行

案幽懷久不寫及甘羅廟二詩今皆

存于集中

第一頁前七行

案趙秉文號閑閑有滄水集其為弘

道所作引今不見于其集

第三頁後四行

案種松詩今見于好問詩集賴此序

知為弘道作末云不見河畔柳顧盼百尺強君自作

遠計今者何所望言學詩能正其趨向自可傳遠也

附識

欽定四庫全書

小亭集卷一

元 楊弘道 撰

賦

宣知賦

昔焉不知今也知之知之謂何宣茲在茲繫氣質之殊  
異故嗜好之參差以已之所是非一天下之是非今前  
二十年既昏且癡積昏成明積癡成智今忽釋然而不  
疑魚喜潛於深淵鳥喜棲于高枝曰吾將易汝之所居

分則必惶懼而傷悲或亢高而慕古或俯下以趨時或  
忽畧于海岳或較計于毫絲樂性天而自得惟上下之  
不移覽六經之所載兮識其正而固持機權用以相濟  
兮無使關鍵之或隳死生大矣不拒不維鬼神饗德天  
地無私

臨水殿賦

王者之營宮室也先卜貢賦適中之地然後揆日以立  
表法天以正位外則雙闕雄峙觚稜嶢嶢內則紫氣配

極鉤陳按次朝焉會焉而穹隆游焉息焉而嚴邃此亦  
崇極于壯麗而天下後世無異議者何哉蓋以尊國而  
觀四方俾子孫無復生心於增益也維嗣君謂之守文  
盍考其義而加詳既獲承于休德當率由乎舊章楚之  
章華未必峻于周之靈臺秦之阿房未必大于漢之未  
央一毀一譽孰存孰亡是知周漢之示制度異夫秦楚  
之為淫荒者耶以祖宗為不可法以制度為未盡美以  
法宮為隘陋以內苑為荒地于是起假山於大內之東

出奇石于太湖之裏棟負斷民之腰脅椒塗瀝民之膏  
髓赤祲示變侈心未已又作清曠純熙之殿今汴人目  
之曰臨水者是也想夫臨幸之初紛雜還而駢闐笑孝  
武之太液兮陋明皇之溫泉飾錦繡以裹地兮奏歌吹  
而沸天耀風漪于陽景兮舞藻文於綺筵命畫師摹異  
鳥之狀詔侍臣進春苑之篇妃姬嬪媼極態盡妍連臂  
踏歌而挽裙留仙增糟丘而為山溢酒池而成川委庶  
政於沉湎之表置萬幾于康樂之邊謂千秋萬歲長享

此樂俄掩涕而北遷俛仰於今幾何指日繁華歇歡樂  
畢傾橈桶暗丹漆木石呈材牆壁露質訝典型之猶存  
存千萬之十一但波光渺茫風聲蕭瑟噫嘻自古侈美  
奇特之觀奉當時之歡無幾而為後人悲傷嗟嘆之資  
蓋無窮悉也余嘗欲一臨其上而賦之友人勸余曰失  
志易沮苦心多感今子三十無成仕途不進可謂失志  
也千里羈旅再喪家室可謂苦心也正使坐子于歌舞  
之場猶且不樂奈何遊覽乎歌傾摧敗之餘哉誠慮感

恒無聊損傷天和而病夫子也余曰不然夫哀情生於  
歡樂之極故齊景公登牛山而哭孟嘗君聞雍門彈琴  
淚下霑襟今余遇繁盛榮華之事輒潜然出涕乃知與  
是相反也意其獲見貴盈而微促者因悟夫天道之難  
人事之不常引喻取譬或能自寬計宣政之間風流人  
物以僕方之何啻鄧林一纖草爾庶幾有以解釋其意  
乎友人曰誠如是也願從子往焉乃歷蔡河之南天街  
之東左界法雲之寺右臨太乙之宮就前簷而趺坐受

水面之涼風俄而身世兩忘心神俱融感傷阻恨豁然  
一空

四言古詩

蓄川

蓄川撫撫閑田可耕孰非人子耕我先塋  
蓄川撫撫閑田可藝孰非人子藝我塋域  
皇天后土日月照臨汝耕汝藝行者傷心  
姦回自終可按可考利見大人全我孝道

五言古詩

古興

貞松千歲質挺生喬嶽陰青崖樵徑絕斤斧胡能侵來  
者不可測禍福常相尋狂風吹暴雨倒瀉江海深霹靂  
根半斷直榦猶森森無人為扶持默傷仁者心

平原陷為湖浩蕩迷津步中有斷纜舟楫舵失先具風  
濤無定期浮沉付冥數忽忽已三年未知止泊處余生  
天地間正可以此喻春郊麥將枯吁嗟望雲霧

遣興

庭草泣晨露孝心悽以悲清溪有蘋藻誰當採擷之黃  
金入富室務積不務施孤鳥東南飛巢在西北枝

雜興

槐檀出新火金鼎羹大截螢尾有微明誰責烹飪事日  
月澈層波老蚌含珍異采之光照乘魚目難擬議李白  
桃天天上苑春明媚雨露成嘉實燕賞歌既醉無名閒  
草花開落自榮悴莊周談天倪垌野非棄置

幽懷久不寫一首效韓子此日足可惜贈彥深

幽懷久不寫鬱紆在中腸為君一吐之慷慨纏悲傷辭  
直非謗訐辭誇非顛狂流出肺腑中無意為文章兒時  
捧書卷十日讀一箱少年弄柔翰開口吐鳳凰正月號  
悲風總帷掛萱堂先君官汝陰九月飛嚴霜累累二十

口丹旒迴南方

原注余年十一正月  
喪母九月喪父哀哉

有叔不讀書但知

禽色荒呼盧畜鷹犬置我遊戲場珠璧不受污拂拭增

耿光郁郁弭南溪絳帳縣郡庠組繡合尺度道業傳諸

生摳衣無幾何叉手一韻成南溪具酒饌列坐子姪行

青綾覆我身醉卧家人傍雲間陸士龍秋試獨騰驤

原注

南溪先生之弟度賢名天瑞嘗為益都府經義都魁

明年桂枝春兄弟雙翱翔半

途失明師欲濟無舟航故人何元理

原注中庸

白日照忠誠

勸我從延賞然後學明經三年走遼碣險阻實備嘗鯨

鬪地軸傾狼狽歸故鄉鐵馬逐人來蹴踏般溪水朔風

振屋瓦巷陌屍縱橫鳴鏑射迴鴈冰消溪水清親朋半

凋落殘月依長庚婉婉兩稚子面黥刀劍瘡田園幸無

恙出郭依農桑鋤耰干戈裏三稔無積倉一官調神京  
妻子不得將風塵復瀕洞齊魯多豺狼賡歌無家別揮  
淚哭途窮李侯藝九畹早播芝蘭香奇字來無趾側耳  
屬垣牆粧鈿剪翠羽墮珥捨明璫綴緝不憚煩既成衣  
與裳一朝忽變化頭角高軒昂男兒可如此陋質傾高  
風庶幾困而學否極承變通師說無賢鄙事業有專工  
苟欲為貿易入市審鞠躬恩袍映野草道與人俱東負  
笈遠方來岐路無修長拂衣叩君門樹屏遮長廊溫言

當八珍令色充壺觴遠來誠饑渴蔓說辭乞漿秉心在  
黑白掉舌談青黃臉紅眼尾斜引手摩匡牀自惟珎珎  
石不中珎與璋君家杵臼閒何事春糝糠乃知畜奇貨  
韞匱方深藏仕途得捷徑改轍歸大商紛紛輕薄子仁  
義久已亡彼非仁義器仁義何可當夫子青雲姿疑似  
令人驚在我固自存為君惜清名冰雪正凝沍屈指迴  
春陽皓鶴毛骨輕雲靜天蒼蒼

遊寧山寺入小敷谷

層層窄堵波建標梵王家寶殿倚絕壁栢逕通門斜入  
山石巖從峽路銜犬牙長溪轉白龍架溜行青蛇迅激  
巨輪翻濺濕生石花出山望平野天鈿蒺藜沙暝色自  
遠至青林欲棲鴉蟬聲促歸思亂響如綠車

大名贈員善卿

小年嘗學詩中年多詩友員子豪於詩而復豪于酒不  
知何所見愛我心過厚報之以新詩金石非堅久

贈李正甫

富貴侈車服鮮麗生光輝貧賤竊慕之勉強終亦非東  
家借駿馬西家借新衣顧盼驕路人識者多笑譏貧賤  
當勤劬富貴起細微俸秩既豐厚不復布與韋詩人有  
佳句剽盜相因依逮其能已出此道方庶幾

贈李尊師

李君本神人冥晦居山中還丹九轉成顏色如兒童致  
虛感元氣語默與天通頻歲傷水旱下民食不充祈求  
降雨澤呼召生雷風上帝聞其賢行事多陰功策名紫

虛府進位稱仙公騎龍上天去此樂無終窮

城隅有一士

南山一何高北渚青茫茫可憐佳麗地荆棘三十霜  
夷營大宅列肆來羣商倡優日歌舞鞍馬照地光  
城隅有一士垝垣繚茅堂習坎失生理家人知義方  
貌言外卑遜節行中貞剛荒涼衆所棄上帝歆其香

洛陽別友

羣居人間世品彙各相索性外更無物樂處當自識東

州有詩翁西州有文伯欲往不計程相逢心莫逆茗酪  
以為飲梁肉以為食古今八商訂經傳爭辯析西風旦  
夕來面上無畏日何以詫妻孥歸裝滿詩什

般水

般水出南山輩行澠與淄雖然未知名亦有神司之惟  
人神之主主亂荒神祠冥冥西南去河伯多禮儀汧流  
接伊洛涇渭同遨嬉漆沮品秩下不敢相追隨竭來通  
漢沔增大西南時泓澄潛怪珍名號遐方知馮夷御白

馬導我朝天池長淮湧巨浪陰獸翻修髻蹭蹬返故溪  
歲旱流如絲敢論尾閭泄甘受蹄涔欺三山興雲氣擁  
掩從靈旗云是東海君按節巡方維不言恐失人自獻  
誠非宜二者當處一故作般水詩

經歷司北軒外新竹房

原注經歷周  
卿請予賦之

高人例愛竹居必置左右此君有雅操凜凜歲寒後黑  
水埋荒煙川濶多屑冑楚山昏瘴雨石罅挺纖瘦風俗  
視樵蘓斤斧莫怨宥蓮幕地深嚴得所逾靜秀青苔春

雨足黃壤潛陽透瑤楨撲霜粉稚子解衣繡義伯歌朱  
華新綠鬱滋茂羣賢贊威德堡障息烽候北軒洒蒼雪  
飲奕破清晝我本性介特禮法以自囿行年涉強仕懷  
玉賈不售何用羨此君更積文行富

玄鳥

太牢祠高禩墜典今誰修何處王謝堂燒痕草芽抽玄  
鳥亦自至故壘不可求銜泥營新巢雲海浮蜃樓甲第  
金臺傍過者疑王侯晨曦明畫棟珠箔上銀鉤

石盆石菖蒲

山迴溪流清瘦莖生九節參桂伯仲間芝蘭婉芳潔重  
城煙塵昏客土膏液絕靈藥不可活我心方蘊結巧匠  
剝雲根汲井注寒冽青青漸滋榮歲晚堪采擷

橙實蠟梅

原注鳳翔普照方丈席上  
與寶鷄主簿李時舉同賦

清霜洞庭實萬里登君筵香膚縷黃金粲粲明秋泉餘  
子甘棄置使與梅爭妍管庫七十家用則成才賢

郊城僧院二首示縣令

君昔為高陵其治在渭北烽火照西郊棲山避鋒鏑東  
轅改邾城浩蕩弄春色莫厭公事繁客來方退食

清晨出都門西望小峨眉中途復徘徊試來一見之授  
館蕭寺中花木榮春熙竟日無人至虛庭看遊絲

送張縣令赴任符離

興定紀年後治道日修飭縣令選尤重非人莫輕得東  
陞控淮泗隱見吳山碧嘗獲白兔瑞賀書出韓筆百里  
今付君陽關歌祖席和風翻行裾花光照長陌十年宿

重兵涉春微雨澤鯨鯢雖陸死餘孽尚狼藉二事俱可  
憂軍食與民力君名在蘭省安能淹此職勿謂不久留  
而遺後人責常思君子居一日必加葺

閔閔子

我本閔閔子結髮事文章處世逢厄運坎軻徒自傷鷄  
鳴狗盜間溷跡潛輝光凶年大兵後荒城守空倉負擔  
非我事徒步昔未嘗四肢不勝勞憩息坐道傍仰觀雲  
悠悠俯視塵茫茫東風吹歎聲麗日為蒼涼

凌霄

凌霄失高樹體弱無所依  
幽禽辭其巢萬里將雛飛  
故園霜雪繁野水稻梁微  
孤根幸不死會有重芳菲  
刷羽待高風要趁花時歸

鄮縣道中

京東千里平孟冬如季春  
寸草不蔽日汗滴途中塵  
異哉中州地若與窮髮鄰  
誰持種樹書遍授東京人

次韻張敏之新居

廢地久不居荒穢難平治經營幾朝暮眼底無棘茨開  
門見南山山若因君杉五言成新詠初不用意為陶謝  
無異源韋柳相連枝平淡含道腴好味同園葵賤子少  
年日壯志生馬馳句格喜孤峭劍鋒白差差有意不能  
達竟日持紛絲投筆忽自笑作者安敢期幸遇斷壘手  
運斤與刪釐毀譽不足信明者貴自知君昔登瀛洲物  
論咸稱宜忽有萬里行雨雪歌來思濟南一茅屋如在  
瀛洲時學道苟無得淚灑楊朱岐同年李夫子尚恨君

來遲萬事一杯酒共和新居詩

赴麟遊縣過九成宮

百里蒼山深地高無畏暑當時移天仗巖谷化玄圃  
隋唐廢興俯仰成今古行人過故宮馬蹄踏柱礎尚餘  
粉皮松野老談女武王龍拏層崖直立嘯風雨最愛醴  
泉碑伯仲廁虞褚石本遍天下墨藪刈其楚年時北風  
惡淫火焚邑聚披榛拾瓦礫周歲何以處

稠桑道

悲臺號長風驚沙暗濁水枝股百道流刮削兩崖起南  
卧稠桑道天穿二十里黃塵深沒脰遊子心欲死讀書  
性所樂困阨苦違已何日息奔騰秋堂富文史

獅子石

奇獸生異域厥名徒耳聆百步走魑魅脰說多不經世  
俗或信之粉續當戶庭塊然園中石髣髴奇獸形強名  
初不似園石本頑冥使君福未艾百指長康寧

木芙蓉

南陽氣候溫四序花相續十月木芙蓉鮮鮮鏤香玉花  
如朝槿妍葉擬文楸綠惜哉開既晚桃李占春旭

袁易靜春堂木芙蓉

少昊秉秋律白藏振嚴威淒其庶物肅颯然羣卉腓茲  
花性莫奪於焉抱貞姿紛披曲榭陰布蔭蒼沼涯沚蓮  
混名族叢菊相因依衆芳固殊品相時各有宜承露愈  
幽艷被霜增華滋雖微後凋操詎先秋草萎臨流誰為  
容倚風猶自持踟躕翫芳態為汝發幽辭

東坡石鍾山記墨迹

先生元豐後筆法陵晉漢摹擬徧天下真偽紛相半嘗  
經石鍾山作記濡柔翰流落百年間水漬頗壞爛從何  
得此本裝軸成珍玩卷舒眼增明百偽莫能亂夢奠微  
言絕箋注多乖叛先生傳家學論著八條貫新經出王  
氏但付一笑粲水經文簡省陋者亦欺謾事在耳目外  
未可以臆斷李渤姑無論道元亦足歎

繡犬馬圖

乳狗銜雉尾，驄馬繫絲韁。舐筆不敢下，衆史空彷徨。匠人出新意，一寸金針芒。絨縷錯彩色，毛骨浮神光。閨中癡女兒，七夕施新粧。年年拜牛女，乞巧羅酒漿。自從見此圖，不刺雙鴛鴦。

古寺

荒陂廢佛寺，古殿依閒雲。殘僧杖錫去，却駐防河軍。天晴山色遠，地迴河流分。詩成獨立久，壞壁夕陽曛。

玉泉院

密竹不見地獨園不知門得門未逢人絮絮溪聲喧升  
階拂塵服合掌瞻世尊方袍二三子磬折禮數煩飯罷  
啜佳茗緩行腹自捫同遊喜清悶快飲卧空樽暗渠出  
泉眼細逕通山根正月笋未生積葉覆蘇痕亭午陽光  
薄竟日夕陰昏燃燈照虛室掃榻眠幽軒鷄鳴出門去  
溪流醒夢魂據鞍一回首但見翠浪翻

祀事不可黷一首

祀事不可黷客頻造靈祠拜跪膝成瘡堪笑還堪悲問

之默無語良久方致詞有身處人間鬼神疇能知固當  
求之人余亦嘗求之千求不肯肯萬求不俛眉違理而  
妄求閉拒固其宜奈何非妄求閉拒常如斯且復祈冥  
冥聊以慰所思言絕仰面哭涕泗縱橫垂

中庭植梧竹一首

中庭植梧竹有意集鸞鳳孤鶴從東來雪衣曬朝陽主  
人驚且喜拊掌呼獲臧俾投數粒粟招鶴下堦傍鶴雖  
不解語其意或能詳我非鸞鳳侶竹梧何可當亦非黃

雀傳數粒安可嘗戛然欲長鳴恐遭彈射傷左右梳修翎翻身入雲翔

靈泉院

長原崩赤土形醜窮且卑人靈代天巧竹樹施屏帷蔭蔚凝青靄磨戛生涼颼隱見阿蘭若寅奉竺乾師廁場挿殿脚洞穴安門楣凌霄燃明燈吐焰髯龍枝芭蕉駐翠鸞安尾靈泉池方甃流不竭一片青琉璃裊裊架蒼竹冰筇縣無時甘冷怯漱齒雅與烹茶宜肘腋野人家

屬屬復離離聞說員莊好未竟神已馳去此無十里水  
竹尤清奇窮通常傍人落日遊子饑志願恒滯違不獨  
在於斯滯違亦自佳庶曰昌吾詩

晨興

晨興意不釋茫然坐多時書帙空插架盤飧懶拈匙筋  
骸厭蹉跎曳履下階基傷心牕外樹霜葉寄寒枝

送仲遠

仲遠豪俠人蹤跡固超越舉世皆侏儒獨有專車骨我

獨何為者折節希前烈嘗進圯上履屢結庭中戰今夕  
祖君行坐愁長庚沒冷落盤溪雲相思夷門月

攬秀亭

微宵媚淑景國香渙瑤英

原注蘭晚

流光追飛轍薜華爛朝

榮

原注木樓紅粧

蔭翠幘顏色俱傾城

原注池蓮盆

清泉漬靈藥細

葉開瘦莖

原注石盆石菖蒲

蒼頑蹲怪石虎兕伏威獰

原注師子石

玄夫時曝背

原注龜

仙馭能長鳴

原注鶴

碎金溥露白

原注菊叢

玉搖風清

原注竹庭

使君衣縫掖頑然早成名金紫豈不貴

道重外物輕觀化一亭中卒歲娛同情

杏園詩二首

綈袍倦晴晝看落瓶中花朝來借長鞭走踏平堤沙杏  
園一片白不辨枝橫斜嗟余出最晚猶及見春華

青雲二公子相約聯鑣出杏園色憔悴把酒酹春日攀  
枝紛墮雪嚼藥香如蜜花落亦無傷綠陰催結實

雲巖

新軒有奇石既異人多聞何時名雲巖小字鐫八分承

以青銅槃槃底藏清芬雲根浸新汲巖竇俄氤氲客來  
淨掃地侍香添寶薰主人竟無譽觀者心自欣物既得  
所主在君即屬君細巨盡如此不須強云云壽王辯漢  
鼎其說非虛文雲巖新軒石香乃雲巖雲

齒搖

齒搖眼始暗庚甲到知非菽粟價如土我獨憂年饑晨  
春汗浹背暮汲月在衣弛擔長太息數口將安歸

出門登長途風塵飄短組到家投空囊霜月照環堵同

胞陷塗泥委蛻化黃土山陽多羈客有客心獨苦  
我本幽棲士強賡彈鋏歌俾汝為馮驩所喪亦已多授  
書不耕獲藜羹養天和白圭有淑質微玷尚可磨

詠鶴

雲羅偶見羈憔悴離江浦剪羽久乃馴燒地教之舞圓  
吭引清喉似欲訴心苦客子居城隅哀吟淚如雨

聞有將遊崆峒者示之以詩

塊破兩土山川狹濁涇注古城隨地形南方劣千步客

從扶風來觸目意甚惡夢想終南山時咏退之句睫毛  
在眼前昧者不自悟十室有忠信貴耳多賤目筭頭倚  
青壁一舍西郊路昔在帝軒轅涿鹿赫斯怒兇豎為鯨  
鯢一戰正王度猶慙廣成子清淨理亦具茲山嘗駐蹕  
北面承教諭何時起宮室土木儼像塑年年夏孟月虛  
邑事遊聚凝粧耀巖谷浮嵐潤巾屨高亭參青雲顯敞  
快瞻顧蒼松龍欲飛廢寺金重布君侯來西臺二府傾  
注措談辯驚賓筵戈矛森武庫名山契真賞駿馬思並

驚當招列仙癯為解升高賦

悼亡

賡歌長相思未歌先淚垂憶昔初裏頭娶妻濟水湄綢繆十載間憂患雜歡嬉一朝遭喪亂倉卒不得辭荒城落日哭悲在留兩兒兒癡誠可憐鞠養失母慈再娶般溪上婦道良同規願從髮抹漆得到頭梳絲奈何同穴志眷戀方再暮食貧居難安一官調京畿分袂未云久故里嗥狐狸凌霄失高樹化作桑楊枝摧枯與攀折寂

寥雨不知沉痛傷人心出門何所之路逢翁與媼偻  
行相隨感我少年心兩度生別離

赴京

栢舟泛清濟慄慄晚秋時畏途愁落日沂流行苦遲夷  
門望不見籠水牽所思默坐柁樓底寸心空自知

送李正甫赴鄂渚詩

武昌在何方君今去處是借問誰同舟秦氏佳公子我  
身非匏瓜安能長在此相思復相思滔滔江漢水

襄陽送秦才叔赴鄂渚詩

高門多驕子愛君性溫舒南北分彼此愛君懷抱虛黯  
然倍常情解纜傷何如從今槎頭鱖不及武昌魚

祝心

祝心同灰冷祝形同木槁典衣授衣月身口交相惱愁  
來出郭門散步入青草南山亦多情依然向人好

東林

翩翩傷弓鳥日暮擇所托西林不可棲東林先沃若上

無梟鳶巢下無狐狸窟一枝有餘安風細蟾光薄

過燕

正月到季月常厭風為政綈袍脫復著天氣殊未定花  
殘無奈何麥短農事病客驅長耳來道路方且迴故都  
廢未久所尚猶可敬慷慨憂人憂不但倚豪勁今茲歲  
逢酉古語庶有證惟酒可忘憂朝來風色淨

歸隱

客從長安來色沮氣不伸問之何因爾憔悴居賤貧忠

誠照肝膈文彩動詞臣二者苟有一亦足售其身後前  
莫推挽坎坷秋復春嘗欲仗一劍萬里清風塵從軍亦  
云樂神武知何人又欲挾一策強國活斯民夜叉守天  
關帝所高難陳安能舉進士得失咸悲辛十年一主簿  
鞭箠還吟呻安能罔市利狙詐忘吾真所得雖倍蓰愧  
汗霑衣巾聞說商洛間山深風俗淳自計亦已熟抱書  
歸隱淪窮年讀經史志一疑於神天道有反正豈曰長  
遭迍諸君勲業了我道亦精純禮儀稽在昔政化持平

均出山應未晚日月明昌辰

代茶榜

原注歸義寺長老勸余作此詩  
長老姓英字粹中自號木菴

東方有一士來作木菴客嘗觀貝葉書奧義初未識叢  
林蔚青青秀出庭前栢滿甌趙州雪灑向歲寒質師席  
有微嫌授客遠公筆俾之贊一辭胥并若為汲低頭謝  
不敏亦頗習詩律以詩代茶榜自我作故實

欽定四庫全書

小亨集卷二

元 楊弘道 撰

七言古詩

贈裕之

嘗讀田紫芝麗華行惜哉紫芝今不存日者見君詩與  
文知君在嵩少神馬已向西北奔國家三年設科應故  
事君亦未能免俗東入京西門低頭拜君昂頭識君面  
碧天青嶂秋月昇金盆未省田紫芝何以稱臞元乃知

紫芝文詞固豐艷至於題品人物猶作涇水渾入城市  
井喧出城草木蕃嗟我廢學曾次愈迫隘但覺擾擾俗  
物遮眼昏天下本多事君子宜慎言譬之山之鄙人終  
日木石間而不見璵璠

李廷珪墨歌

原注趙節使治邠平涼運同知張顯之來晏於公署之凝香閣致政

張相公在座余亦與焉節使出示李廷珪墨席上試墨余戲以墨汁漉酒中飲之明日出此篇

二老皆有和詩

軺車下涇川二老歡忘年夜寒辟易凝香閣長檠粲粲

金花然平頭奴子捧漆匣錫圭入手輕而堅客卿裔孫  
滿天下系出隴西獨稱賢座中有客慙菲薄藜藿貯腹  
空便便朱提飲盞漚芳液玄雲霏霽浮秋泉一酌濡夢  
傳之柔翰再酌霑蕪穢之靈田祈禳厭勝古亦有合座  
拊掌嗤且憐君不見將軍飲酣出刀稍作氣欲斬橫海  
鱸客卿如靈俾我慧悟加諸前待渠宣力恢復舊封域  
雅什願讀車攻篇

寄鞏州司農少卿李執剛

潦水已除泥尚濕疽瘡既平膚尚赤

原注去年田瑞據鞏州反細烹

糜粥食疲人明示金科懲暴客朝廷好爵不輕授夙夜  
小心憂重責政成合沓起民謠一片青青襄武石

投鄧州節副劉光甫祖謙

仲秋八月離平涼隴月光寒涇水黃弱妻抱子乘瘦馬  
服玩附行猶一囊鄠郊藍水不敢住東南深沓崔嵬藏  
洛南十月戎馬嘶市人散走如驚獐攜妻抱子竄山谷  
倉卒不暇持資糧山高樹密積葉滑側足數步顛且僵

倒身枕臂天欲曉頭上肅肅飛嚴霜勞筋苦骨數百里  
今日得升君子堂一囊服玩不復顧數冊猥藁情難忘  
君能貸我一茅屋忍饑默待時明昌

戲答游麟之

游麟之之麟游欲去未去邊風秋鳳翔壁壘壯如鐵從  
此始免為俘囚驚魂悸魄返其體故當北望山林羞奈  
何健筆恣嘲弄大篇長句令人愁

若人

哀痛淄州城再破千里蕭條斷烟火當時逃難逾黃河  
二紀歸來非故我眼前十口不安生白頭又復辭先塋  
若人方寸包藏惡害物慘於城陷兵

望南極

老人深居未嘗出我欲見之不度德斗量明珠秤稱璧  
越羅蜀錦千萬匹紫沈白檀隨海舶輯之燎之半天赤  
香霧中間嚴奠瘞如此庶幾見髣髴汝家搜索有何物  
布囊破裂筐底脫心知不能情未已夜夜中庭望南極

題老子廟

乾壕石壕過峻阪骨煩筋殆思寬平蒼崖小殿揭金榜  
冷泉高樹夕陽明流俗相傳禱靈藥妄以沙土欺聾盲  
但知經過記歲月小字壁間題姓名

甘羅廟

峻坂欲盡長坡迎後山未斷前山橫甘羅廟下四山合  
太始鬼物成天城道傍一峰立突兀瘦木上下攢飛甍  
此郎片紙附遷史勲業不足煩題評尚憐稚齒據高位

因使細人輕晚成山間一笑為絕倒多少豎子談功名

南陌梅花詩示張守道守道見和復用前韻

春寒茅屋晨興遲起來倩人為折枝緬懷騷客賦蘭菊  
蓋喻忠信期君知聖賢垂訓惡無禮東家不敢鑽穴窺  
早梅香好動詩興已恐落英嗟後時故園桃李委塵土  
怨調曾託長相思小兒蟻蝨滿黃髮何處亂山尋玉卮

疑夢

書封圓細書旨勤書中字字非虛文鴻鵠垂翅志霄漢

飲啄不肯隨雞羣堂前趨走典謁者堂上軟語芝蘭薰  
出門月朔忽月晦敬聽命召寂無聞覆蕉求鹿不知處  
自猜身是淳于棼官街馬過不聞聲但見飛蓋飄青雲

鷓鴣

鷓鴣鷓鴣生炎方有耳未嘗聞北翔鷓鴣鷓鴣何形色  
北人見之應不識前朝鼓吹名鷓鴣上稽下考不見書  
而今歌舞聞見熟試為後生陳厥初東京有臺高百尺  
北望驚吁半天赤塞垣關鍵夜不扃河南河北無堅壁

鷓鴣飛入酸棗門青衣行酒都民泣長淮東注連海潮  
終南山氣參青霄大田多稼際沙漠幽州宮闕何嵯嶢  
金天洪覆需雲潤內自封畿外方鎮霜葉烟花秋復春  
妙選細腰踏繡茵優絲伶竹彈吹闌主人起舞娛嘉賓  
玉帶右佩朱絲繩牌如方響縣金銀低頭俯身卷左膝  
通袖臂搖前拜畢露臺畫鼓靈鼉鳴長管如臂噴宮聲  
初如秋天橫一鶚次如沙汀雁將落紅袖分行齊拍手  
婆娑又似風中柳鷓鴣有節四換頭每一換時常少休

次四本是契丹體前襟條閃靴尖踢或如趨進或如却  
或如酬酢或如揖或如掠鬢把鏡看或如逐獸張弓射  
踣蹶蹙躄更多端染翰未必形容殫主人再拜歡聲沸  
酌酒勸賓賓盡醉僚屬對起相後先襟裾凌亂爭迴旋  
鷓鴣為樂猶古樂大定明昌事如昨風時雨若屢豐年  
五十年來人亦樂勿言鄭衛亂雅歌人樂歲豐如樂何  
朱門兵衛森彌望門外聞之若天上隗臺梁苑烟塵昏  
百年人事車輪飀倡家蠅營教小妓態度纖妍渾變異

吹笛擊鼓闌闌中千百聚觀雜壯稚昔時華屋罄濃歡  
今日樂棚為賤藝白頭遺士偶來看不覺傷心涕霑袂

懷春怨

妾身可以化石妾手可以縫裳薑桂失地而猶辛桃李  
非時而不芳睡起倚門嘗佇立翩翩蝴蝶過鄰牆

邂逅

過燕不見世子丹過趙不見平原君煩襟清濯易水風  
破袖欲拂恒山雲天生奇才無古今邂逅辭氣如蘭芬

北遊得此亦可樂繫筑奮鉞何足云

原注過保州初識  
郝伯常過真定初

識高雄飛

劉道濟

### 金陵徐信之牧牛圖

誰貌吳牛馱牧豎建業徐生寓深趣母子孤特失儔侶  
行行暫息烟中樹九十其孳何處尋或訛或寢隔山林  
牽柔折脆方為劇詎識離羣舐犢心

### 贈裕州防禦

皇帝二載歲乙酉八月花川墮天狗

原注田瑞  
據鞏州反

宥親釋

黨可攻心

原注田瑞之父在甘谷釋不殺

結趙連蜀憂掣肘運芻輸粟

正磬磬環甲執戈徒赳赳聊城朝飛仲連箭

原注矯制赦城中

夏人暮擲惠琳首借籌功大克渠魁失馬過輕傷利口

原注防禦時為行省郎中陝西和買馬在鞏州城降多為將士掠取之坐此而罷

天鑒長懸日

月明皇恩更賀丘山厚萬家特旨畀韋虎千里長謠得

杜母憶昔軺車到鳳翔特遣朱衣邀馬走金剝剝橙催

賦詩

原注鳳翔普照方丈席上請余賦橙實蠟梅

銀盃行酒無停手許遊蓮

幕廁英髦欲瀉蘭湯洗塵垢武陵回首山縱橫薦福打

碑雷震吼

原注余到平涼防禦已罷職

馬首東之詎可留雞肋空持

復何有嘶風驚聞沙塞馬挈家來覓商巖叟控弦突騎  
若憑虛戰格連雲如拉朽洛南屠滅彼何辜渾谷奔忙  
誰敢後仰攀危磴蝸篆壁下墜深阮杵投白血屬有幸  
脫微軀家具豈能存敝帚恩全終始屬賢良仁濟困窮  
多福壽借君寶劔買黃牛苟全性命歸南畝

賞菊張濟道家分韻得菊字

鹿車西來聲轆轤夜夜空山草間宿今年蝗旱草亦無

懷川竹林如帚禿旅人懷抱從可知失喜君家籬下菊  
況逢名勝宜盡歡談笑未終眉暗蹙賦詩把酒獨移時  
日下風淒體生粟吁嗟世上無唐衢若有唐衢見應哭

詠晴

二月已破春將殘連朝風雨春猶寒烟消日出好天色  
城隅花柳猶堪觀萋萋芳草平沙路乘興招君共君步  
恨無樽酒助清歡賴有溪藤書鄙句荒城勢與河流灣  
憑高望遠開愁顏天低野闊樹如薺幾點翠色符離山

寓形宇內宜自適吾土他鄉奚所擇與君同立東風中  
一笑相看誰是客

常武殿試護衛歌

夷門上傾遼水渾東方日出天下明湯盤既銘德日新  
萬國貢篚來燕京朱門霜戟崇元勲鳳毛麟角歌振振  
白弓長箭紅鶴翎紫薇垣外羅天兵鯢鵬變化實通津  
百年聖神相繼承正大天子壽萬春恒山風暖河源清  
爰得方召為虎臣虎穴生子被奇文殿前較藝羽衛陳

弓梢拂弦霹靂聲聚星玉版湛玄雲宣城紫毫點姓名  
高門繼世承天恩

謁詩

我夢神遊入官府少年掖翁出東廡傍人相指竊笑語  
掖翁少年乃宗武須臾呼我傍簷楹聞汝頗有能詩聲

奈何低首就驅役

原注時為刑部委差官

更勿赴我詩壇盟慙惶

趨出肩背縮偃偃步遶山之麓忽聞笑語愕眙之小橋  
流水環青竹仙人雜坐陳壺觴舉酒揖我邀我嘗數盃

萬慮都不記恍然寢室明晨光人生大抵如夢爾夢飲

陶陶寤猶喜益知飲酒可忘懷市東走訪劉夫子

原注  
寧州

劉玉  
潤甫

先生衰髮不勝簪研丹點句傳青衿世緣消盡唯

好飲縱欲酌我囊無金元年建亥月官有陳省雜

原注  
滄州

陳歌  
和之

嘗欲醉先生省雜豈苟合元年建亥月官有呂諮

議

原注  
真定  
呂鑑仲寶

嘗欲醉先生諮議亦誠意陽月風日如春

熙梅花三兩開南枝二官清要少公事願從先生一訪

之

雪晴夜半月出戲效李長吉

瘦日已匿崑崙西太虛漫漫圻濁泥濃愁蠹心欲成粉  
耳根似覺殘蟬嘶孤螢尾暗蝸聲靜銀闕照耀神驚迷  
冷光直上三萬丈團黃一點通靈犀天花飄盡桂花發  
陽烏却避城烏啼樹枝不動印空碧凝雲樹外橫長堤

琪樹歎


初見琪樹梢出牆再見琪樹花飛香涼風蕭蕭雁南翔  
峴首山前多稻梁龍沙高馬肥如羊漢陽漢陰為獵場

旅雁哀鳴野水傍琪樹晚實天早霜不獨琪樹少顏色  
中州草木皆萎黃

王子端溪橋濛雨圖

皇風皞皞吹王民樂哉大定明昌人文章與時相高下  
黃山竹溪麗而醇秦碑晉帖落萬紙明珠白璧非常珍  
興陵佳氣成五色聖孫龍袞居紫宸三十六宮誦佳句  
翠簾不捲楊花春子端振衣起遼海後學一變爭奇新  
黃山驚歎竹谿泣鼎鐘騷雅潛精神雲山烟水無常形

潑墨不復求形真挽弓楊葉百中後衆人擊節高人蟬  
君不見傳呼畫師閭立本池上愧汗霑衣巾丹青馳譽  
尚如此溪橋濛雨徒自塵淄川賤士長安客品題不慮  
傍人嗔



欽定四庫全書

集部

小亨集卷三

詳校官中書

臣徐志晉

侍讀臣孫球覆勘

謄錄監生

臣王人作

謄錄貢生

臣王兆泰

欽定四庫全書

小亨集卷三

元 楊弘道 撰

五言律詩

晚晴

一雨破煩暑獨園涵晚清高人澹無慮客子若為情殘  
照望中下亂蟬聲裏明冥冥百靈散何處覓虧成

次韻趙司理山甫

身喜霑皇化心慚讚老成青衫初借著白髮已潛生會

計唯期當康寧未暇營如何清夜夢常繞大堤行

留別劉伯成王景伯

公幹文無敵義之字有聲三年今日別千里隻輪行學  
海君能至為山我未成受田如古制應伴野夫耕

別仲經

相逢嘗共被東縣與西州無策不成事有身空遠遊如  
君勤問學度日亦窮愁濡沫能微濕生涯善自謀

麟遊秋懷

敗葉落還落北山深復深暮雲封遠恨涼吹和微吟鏡裏雙蓬鬢霜餘一絮衾求仁又何怨安取四知金

遣興

襄鄧留多日溜青即故鄉落花縈綺席飛燕拂雕梁巢穩由知擇風飄未可量履新冠已敝上下豈無常

答張仲髦

韓杜遺編在今誰可主盟故人相敬愛健筆過題評風鐸不成曲候蟲常自鳴吾詩正如此未敢受虛名

陪趙節使遊自雨亭

西郊迎使節飛蓋轉崇墉石逗楚天雨山巢炭谷龍清  
溪羅帶曲雜樹錦幃重更覺晉公樂

原注張參政

幅巾兒姪從

贈鄭尊師

茫茫雲著地撼撼雨交天篁竹連河上青茅盡海邊棲  
遲聊應化放曠且談玄相對蒲團坐清風為肅然

遊石龍窩

何處浮休宅山公從葛强蒼崖晴散雨紅樹晚凋霜翠

琰尋詩讀銀瓶湯酒嘗茲遊乘逸興不覺到斜陽

贈馬升公

學出韜鈴外身從筦庫還著書期後世辟穀卧空山渺  
渺追前列區區若是班尚為妻子累時復見人間

贈呂鵬翼

燕市重來日東風兩鬢皤行穿鞍馬過意厭客塵多青  
眼常相見朱門不重過如君古漆井澄湛已無波

風雨夜泊

舵鳴風逆水大纜再維舟競起如相約喧呼久未休收  
燈陰漠漠聽雨夜悠悠料得茅齋裏家人為我愁

次韻田長卿

欲伴秦人隱桃源何處尋俯慙魚在藻仰羨雀投林未  
有絲生鬢寧無血染襟回頭望鄉國靄靄暮雲深

和鑑上人

畏日照城郭誰家庭戶清禪房留過客詩筆見高情仙  
果根株異湘紉節奏明如風行水上文理自天成

次韻趙晉卿二首

寒更不易旦松竹滿庭風未寢覺燈暗欲挑憐燼紅四鄰飛化蝶一室學冥鴻吾道本如此孰為窮與通

寒更會有旦松竹靜無風一室虛生白半窓明映紅能文韓吏部歸隱漢梁鴻吾道本如此孰為窮與通

喜聞特賜麻知幾及第

原注知幾名九疇

麻子明經術詩名亦遠揚連年不中第掃迹欲深藏廣譽開宸極新恩照勅黃少時以病罷歸路益生光

抱璞

抱璞人間世從渠知不知但能安義命何用禱神祇乳  
下子初育桑柔蠶亦孳衆人應昧此擾擾競奔馳

重到礪山示白文卿

原注久不歸所  
寄麥故有是詩

不解營微利元非市井人麥秋農事遠花月客途貧路  
隔魚山水衣餘毫社塵小兒無倚賴夢裏鹿臺春

示亨甫

靜退非今日疎慵自昔年平君心上地全我性中天文

史閒來讀形神困即眠夢中歸故里瑤草碧和烟

偶作

碧草含秋意黃雲起暮容歸鴉昏且噪去雁遠無蹤杯  
酒因循醉明人邂逅逢身名猶碌碌正望日疎慵

鄰野

故宮成市井卜宅地非偏門掩依茅棟身閒樂性天苔  
花侵砌上瓠葉蔭窓前有子營家事何須二頃田

阻隆曲寨

十月雷驚蟄黃雲接地陰冰銜丹水細山擁武關深濡  
沫思靈沼傷弓失鄧林通途施陷穽之子獨何心

麻刺史復職

長風起天末奄忽捲浮雲冰雪春自釋芝蘭久彌薰廉  
頗時再用鄒湛世無聞一掬峴山淚樽前分付君

荆楚

荆楚三年客風塵七尺軀青蠅點白壁赤水得玄珠息  
謗能無辨酬恩正勉圖憂勤生逸樂魚稻老江湖

嵯城

嵯城看月色望極若微陰  
光射星辰暗氣迷閭巷深  
人和為善守蟻附覺難侵  
我亦耽詩者園中不廢吟

送王飛伯

吟詩何所得白髮早生頭  
始覺虛名誤應為達士羞  
梁園遇飛伯俊氣挾清秋  
嵩洛引歸思因余故少留

送麻信之

愛客出天性君來心事違  
窮愁詩興淺風雨杏花稀  
相

對忘饑渴高談訂是非穰城二月尾吾亦欲東歸

贈彈琴呂道士

蝸舍侵闌闌興居厭市聲靈宮有琴隱一室若冰清境  
靜三尸伏調孤一鳳鳴從今數來往毋送亦毋迎

樂道

白首來何暮青衫寵若驚浮榮能幾日高節冠平生良  
史不虛美真儒集大成讀書多樂事六十眼猶明

吾道

衆好常違俗孤清且自成  
食苗維皎皎止棘信營營  
莫為虛名誤宜因微罪行  
何思復何慮吾道付神明

弔彥深

何物如金惜醫來欲致功  
難遮前路黑驚見缺壺紅  
北渚遺居室東郊寓殯宮  
勞心成底事五十六年中

弔解飛卿

一昔傳君逝聞之久愴然孤兒幾滅性  
孀姊已華顛與客謁茶去

原注客謂安陸趙仁甫

點酥嘗自煎如何從此別誰識

是終天

夏雨

坐對雲峰起已欣風腋清螟蝗猶未殄天地豈無情轟  
礚雷音轉蜿蜒電影明滂沱洗煩暑裁害不能成

擊柝

擊柝者誰子夜天星正繁絳紗明燕寢黃耳警豪門雀  
鼠耗倉粟豺狼踰塞垣客窓求睡穩嗟爾漫喧喧

月下聞笛

三弄傳遺譜誰當清夜吹香飄丹桂子聲裂翠筠枝鳴  
咽星河動悠揚風露悲侵晨拂明鏡綠鬢恐成絲

潁州西湖

曲岸匳明鏡微風皺碧羅誰將比西子我獨憶東坡亭  
古落塗墜露涼荒芰荷放生仁號在魚鼈賴恩波

雁

肅肅南飛雁微生也解謀草黃沙磧遠水闊洞庭秋霄  
漢人何慕關山客自愁夕陽堪入畫零亂下汀洲

澄心齋詩

退食公園後焚香即燕居鏡明含萬象水淨見羣魚幕府當荆楚官曹塞簿書靈臺塵不到作計未為疎

題子產廟

相鄭稱遺愛云亡感聖人養民殊夏日出涕比祥麟故國多喬木虛堂若有神褰裳病徒涉歲暮客愁新

劉節副內鄉新居

去職未云久幽人時到門劇談臻性理隨意具盤飧鑿

井城隅宅買牛江上村  
聖朝深眷遇安得守田園

夢庵

吾子元居屋經營頗用心  
移花紅滿檻種竹翠成林  
愛畫分三品收書費一金  
十年方有此安可夢中尋

寓濟源

幾年無定止生理與誰謀  
欲結黃茅屋如營白玉樓  
詠歸沂水暮招隱桂叢幽  
鄉里稱為善懷哉馬少游

風霾

牆下開蔬圃盤飧得助多春畦不甲坼沴氣奪陽和青  
失南山色白生北渚波暮年能委順彼亦奈吾何

唁高士美

原注士美名嶷嘗宰藍田承左司局  
赴京中路為商帥之所困辱時洛南

方被  
兵

王室方求士轅門亦選材  
勛逢彼怒偵伺望塵迴士  
命輕如紙詩名冷若灰  
君歸無所贈長折浙江梅

病樹吟

病樹仆河濱長吟喻此身  
摧殘凡幾日濕朽不堪薪  
兩

府風烟接十年往復頻故人憐我老相見益相親

過濟南宿洪濟院贈海州果上人因寄鄉中親

友

滄海居何遠慈雲出未還將遷僧寶塔

原注改葬空老

就禮佛

頭山邂逅逾三宿夤緣見一斑預聞親舊在喜色破衰顏

重到靈巖寺

七歲嘗來此于今五十年當時隨杖屨名剎在林泉已

廢嗟何及猶存亦偶然先塋耕墾後濃露濕荒烟

故人

疾風巢再毀烏鵲却飛迴嗟我豈殊此故人安在哉重  
遭難食厄遠冒畏途來莫問交疎密交疎亦可哀

哭劉叔京

甲庚俱舊識類聚不同方過客傳皆死知君今獨亡無  
兒為繼世有弟託遺孀吾道微如縷傷時復自傷

哭王子正

匹婦主中饋雖貧生理存一編藏麗則隻影卧黃昏漫  
下陳蕃榻虛霑文舉樽北平家世絕銜恨入荒原

宿普照寺

被酒暑增劇漱茶神少清旅人須授館侍者詎忘情方  
篋鋪霜滑虛櫺界月明晨興求紙筆枕上有詩成

次韻孟駕之清明會飲城西桃花下

出郭到花塢何勞人遠尋已降詩筆健更怯酒杯深名  
士仍知已清談可淨心新篇誰協律別後欲長吟

濟瀆廟

焰焰謝仙火北風吹欲然  
重源靈跡在喬木性天全  
殿宇瞻遺構碑詞閱舊鐫  
後來知有考鳳鳥至何年

慈湖客夜

涼意江城早秋聲客夜多  
露凋佳樹木月照舊山河  
爭戰何時定功名兩鬢皤  
湖邊營壘近隔水聽笙歌

醴泉寺詩

賢相讀書處黌堂更不開  
嘗聞先子說直到暮年來  
失

路穿谿澗褰裳出草萊山形蒼玉玦古殿倚崔嵬  
老栢參天色流泉直殿迴樹從何代有水自上方來破  
日期留宿殘僧病可哀索然高興盡欲去尚徘徊

七言律詩

留別高君玉

羨君中歲早知還擇勝棲身意自閒二頃良田十畝竹  
一溪流水四圍山客中把酒聊乘興愁裏題詩亦強顏  
明日東風吹破袂仙居回首白雲間

投黃司李

未脫來時舊衽衣  
語言面目復何施  
無心求僭士人服  
餬口可為童子師  
過世有緣蒙顧遇  
窮途乏力仗扶持  
漢江十月蕭蕭雨  
一夕顛毛半作絲

六月十四日濟瀆廟即事

霖雨方能救旱田  
廉纖不稱立秋前  
南風颯颯披蒼竹  
四海浮浮起白烟  
雲漢數章因盡廢  
神靈諸說定虛傳  
餅餌一勺清源水  
慙愧他家望有年

記所見

歷下高亭久已灰尚堪登覽有荒臺艷歌相勸十分飲  
優戲能供一笑咍北渚蓮舟迴棹速華山烟雨過城來  
翠鈿紅粉愁霑濕俄頃斜陽射酒杯

別楊信卿

邂逅株林酒一盃汴梁同見菊花開浪遊我逐何人至  
應舉君隨計吏來漆店夢迴風瑟縮鐵樓歌罷月徘徊  
又還客裏成離別後夜思心半握灰

客夜

晦月未生星滿天  
夜涼就枕露簷邊  
漏聲迢遞蟲聲外  
愁思纏綿睡思前  
羹釜慮遭丘嫂厭  
綈袍倘有故人憐  
丈夫此事常慵說  
強託新詩句裏傳

贈刁益之

當年投筆去儒宮  
雲翼搏霄負積風  
魏闕殊恩縻好爵  
冀方偉績攝元戎  
侯藩戶部悲歌外  
宰樹家山醉眼中  
應接尚無衰憊氣  
不應便作嘯嚚翁

陝州贈楊正卿

毫社相逢歲已深，別來名氏映儒林。  
揚雄既奏河東賦，子賤嘗鳴單父琴。  
洪水豈知人墊溺，南山不與物幽沈。  
東風重會棠陰下，白髮滿頭塵滿襟。

武當山張真人

張公披髮下山來，欲為神州救旱災。  
感召上天垂雨露，指揮平地起風雷。  
槁苗再發還堪刈，枯木重榮不假栽。  
受詔即思歸舊隱，瓊樓玉殿繞崔嵬。

寄武當山人張真人

山走西南氣勢尊大神遺跡至今存  
冰橫澗下千年凍雲起巖前萬里昏  
既有威嚴彰赫赫詎無厚福護元元  
真人制行通天地日月飛仙降殿門

送薛玄卿歸龍虎山

金門詔下羽人歸欲向山中採  
薺薇琥珀懸崖松樹老琅玕倚澗竹  
根稀高巖畜雨星辰濕古石懸雲徑  
路微養性可無軒冕累遊塵元不浣  
仙衣

送吳真人

具嚴威命有祠官  
歷祀名山不厭難  
上帝乘龍遊下土  
真人騎鶴降虛壇  
已刊白玉為封檢  
更鑄黃金作祭冠  
國壽延洪千萬歲  
願祈穀熟小民安

贈王數學

誰將陽一對陰二  
天地亦無如數何  
自有生民君子少  
歷觀往古亂時多  
希夷愁極乘騾笑  
康節懷深擊壤歌

窮變變通吾未究  
君家易總尚存麼

原注王遠知事

贈劉潤甫用新秋遣懷詩韻

三多錄鍊到精純  
傑句雄篇若有神  
琴枕贊成傳後學  
蠡盃賦就繼前人

原注賦警句云似華而朴若脆而堅

瀛洲渺渺嘗迷路

頭髮蕭蕭不滿巾  
倦對青衿把雞肋  
杖藜思卓故鄉塵

秋懷

幾年遷逝困徒行  
強倚西風籟菊英  
夢幻軒裳非實相  
簸揚箕斗但虛名  
倦談圯上逢黃石  
欲向山中覓赤城  
四海無人託孤劍  
蒼天白日照忠誠

贈朱彥暉

嘗讀香山醉吟傳一觴一詠最關身平生用此忘憂患  
老去安於處賤貧自作白丁辭酒伴竭來青社得詩人  
與君況復生同代尚友千年似隔晨

送句曲外史張君歸華陽

送君高舉入華陽古洞陰蟠石路荒蔽日旌幢朝旒旒  
飛空環珮夜琅琅餐霞已試登仙訣祝竈還修却老方  
見說陶公雖隱去猶將道德佐齊梁

贈楊飛卿

三百周詩出聖門  
文為枝葉性為根  
不憂師說無匡鼎  
但喜吾宗有巨源  
我自般溪移厯下  
君從汝海到東原  
東原厯下風烟接  
來往時時得細論

贈盧希甫

般陽兵後步之青  
古驛荒寒粥夜烹  
四舍分程曾借宿  
一杯數種不知名

原注諸  
野草子

二千里外新歸客  
三十年前

舊友生賓館  
莫嫌來往數  
中途霜露已無情

青社別友

灤源清駛鉗城流一幘蕭然上客舟  
瀕海地荒風送雨  
幻身家遠病逢秋久知作事常難遂  
無挾投書亦漫求  
別後因閒若相憶  
中山西北是齊州

施淮馬與鑑上人

嗟嗟牝馬老而羸  
况復雙瞳障腦脂  
相下得之來汶上  
暑天忽爾到寒時  
貧家芻秣應難繼  
末路庖厨不忍為  
若踏金田宜努力  
庶成善果脫毛皮

贈元伯

相然清夢遶芳蘭  
逆旅天教識鳳鸞  
一榻既因徐孺設  
綠琴來對子期彈  
下喉久厭江瑤柱  
入手欣逢銅彈丸  
既悟詩人最佳處  
肯誇淫潦卷狂瀾

贈李慶之

聞道懷人謝寵榮  
南風吹我入巖扃  
樹迷村落千重綠  
山切雲霄五朶青  
徒步歸程無定日  
相逢屈指計周星  
去年十月商於路  
欲說愁君不忍聽

贈馬君美

波揚溟渤駭長鯨何處熙熙物自春山下有田皆種德  
天涯遊子欲親仁雲烟荏苒風塵遠林壑幽深虎豹馴  
數冊閒書一茅屋此中便可著閒身

